

## **Prèju de late, prèju de gana**

Su pastoriu, galu oe in Sardinna at unu pesu econòmicu de importu cun 12.000 aziendas ispainadas in totu sas biddas de s'ìsula. Duas partes de su late de berbeghe e prus de su mesu de su late càprinu italianu est produidu in Sardinna. Ma su balore de su pastoriu - finas si contribuit a batire richesa, diretamente o indiretamente, a unu muntone de atividades: caseifitzios, manzimifitzios, trasportos, masellos, veterinàrios, chene ismentigare sos chi traballant in sos entes de incherta (Agris), in s'universidade, in sa rezone e in sos entes cullegados (Assessorados, Laore, Argea, Ara, Izs e àteros) - non cheret medidu solu pro su chi pertocat s'economia.

Su pastoriu andat cunsideradu finas, si no mascacamente, pro su balore sotziale, culturale, ambientale, paesazìsticu ca mantenet galu bias sas biddas de intro de Sardinna, est unu mèdiu contra a s'ispopolamentu, pro prevènnere sos fogos e pro cuntrastare su degradu de su territòriu. Su pastoriu est presu a sos ischires traditzionales e a su territòriu, est ispainadu in totu sa Sardinna, in onzi bidda b'at pastores. Est ligadu cun s'istòria, sa traditzione, sa tziviltade, sa cultura e sa limba sarda. Est duncas unu elementu de bundu de s'identidade de su pòpulu sardu.

Mancari gasi sa filiera de su pastoriu dae annos non resessit a agatare un'àndala chi andet bene a totus e chi siet a tretu de fàghere crèschere ambas partes de sa filiera e no una banda ebia. Duncas est pretzisu a amodernare sa filiera cun una cultura noa de cunfrontu intre sas partes. Indùstria e massaria, difatis, divent arribare a unu acordu de filiera chi siet de profetu non pro sos industriales ebia ma finas pro sos pastores.

Est pretzisu, duncas, a disinnare unu sistema de normas pro regulare pro semper sas relatas intro de sas partes, garantende sa trasparèntzia in totu sos momentos de sa filiera.

Mascamente pro su chi pertocat su prèju de su late (ma balet su matessi pro cussu de sos anzones e pro sa lana). Sos pastores versant su late a s'industriale ma su bonu de sas bortas no ant unu cuntratu iscritu, s'arranzant a paraulas ma est s'industriale chi detzidet su prèju.

Unu prèju zustu de su late garantit benistare a totus, industriales e pastores. Si su prèju est bassu sos pastores protestant. In su sèculu coladu sas crisis bi fiant ma una borta onzi chimb'annos, in sos ùrtimos bìndighi annos càpitant belle onz'annu. Sa resone de sa crisi, su bonu de sas bortas, est ca si produit tropu Casu Romanu. Onzi borta chi est istadu produidu prus Casu Romanu cunforma a cussu chi pediat su mercadu, su prèju est minimadu e de conseguèntzia est abassadu finas cussu de su late. Si pigamus sos annos 2011-2014 cun una produtzione mèdia de 250.000 cuintales, su prèju de su Casu Romanu est arribadu a 9,50 èuros su chilu, e su late l'ant pagadu mediamente 1,20 èuros su litru.

In sos annos 2015-2018, cando sa produtzione at superadu sos 300.000 cuintales, su prèju de su Casu Romanu est achirradu a 5,40 èuros su chilu e su prèju de su late a 60 zzentèsimos su litru.

E sos pastores ant torrada a protestare. In su 2019, a pustis de custu suluvertu e de unos cantos cunfrontos istituzionales intre sos Sindacados agrìculos, sa Rezione sarda e su Ministeru de sa Massaria ant agatadu a un'acordu.

Pro sa prima borta ant bogadu a craru unu mecanismu chi narat chi su prèju de su late dependet dae s'andamentu de su prèju de su Casu Romanu. A narrer su zustu finas in antis su prèju de su Casu Romanu detzidiat su prèju de su late, pro sa prima borta custu l'ant postu pro iscritu.

In su mese de martu de su 2019, cando ant fatu s'acordu, cun su prèju de su Casu Romanu a 6 èuros su chilu, ant istabilidu su prèju de su late a 74 zzentèsimos su litru. S'acordu at disinnadu chi a su crèschere de su prèju de su Romanu deviat aumentare su prèju de su late.

A pustis de su mese de martu de su 2019 su prèju de su Casu Romanu est andadu semper aumentende cando chi su prèju de su late, chi cunforma a s'acordu deviat crèschere cun s'aumentu de su Casu Romanu, est abarradu a 74 zzentèsimos: duncas sos industriales ant pagadu 74 zzentèsimos su litru. Sas cooperativas pro su 2019 ant pagadu dae 90 zzentèsimos a prus de 1 èuro. In s'ùrtima annada (2019/2020) sos industriales ant pagadu mediamente 85 zzentèsimos cun su prèju de su Romanu chi a s'agabu de su 2019 fiat belle a 7 èuros e in sos primos ses meses de su 2020 a 7,40 èuros. De cunsiderare chi unas cantas cooperativas 80 zzentèsimos los ant dados in acuntu pro su 2020 e cando ant a serrare sos contos ant a dare su restu; a onzi manera ant a pagare unu prèju prus artu de cussu de s'indùstria chi ocannu est paghende 85 zzentèsimos.

In fines s'indùstria chi impreat tecnolozias prus avantzadas de cussas de sas cooperativas, chi s'addatat de prus a su mercadu e duncas est a tretu de pagare unu prèju prus artu de sas cooperativas, at pagadu prus pagu.

Ite si podet fàghere pro chi su prèju pagadu dae sos industriales siet a beru unu prèju reale de mercadu e non siat impostu a prepotèntzia?

In antis de totu bi cheret trasparèntzia in sa filiera e unu sistema pro arribare a su prèju zustu. Si non b'at trasparèntzia non si podet disinnare. Pro fàghere cale si siat disinnu subra su pastoriu cheret a connòschere totu sos paràmetros econòmicos de sa produtzione, de sa trasfomatzione e de sa bèndida. Oje nois no ischimus cantu late si murghet in Sardinna, ischimus a ue andat solu una parte ebia de custu late, cussu chi benit impreadu pro fàghere sos casos a DOP ma nudda ischimus de 130 milliones de litros (semus faeddende de prus de su 40% ca in Sardinna si produint pagu prus o mancu 300.000 milliones de litros): ite casu si faghet dae custu late, cantu si nde faghet, inue benit bèndidu

e a cale prèjos. Mancat, duncas una fotografia crara de sa filiera, chi est netzessària e pretzisa pro fàghere unu cunfrontu intre sas partes.

Si si resessit a fàghere aplicare sa Leze 44 de su 2019 - chi previdet chi sos industriales chi comporant late onzi mese divent rezistrare in sa *banca dati* de su Sian (Sistema Informativu Agrìculu Natzionale) su tantu de su late chi ant comporadu e onzi tres meses su tantu de casu chi ant fatu, su tantu de casu chi ant bèndidu e cussu chi ant in magasinu – sa chistione diat dèvere cambiare.

Solu si b'at datos seguros si podet arribare a fàghere unu prèju de mercadu, istabilende unu sistema pro carculare unu prèju de su late chi tenzat contu de paràmetros reales de mercadu a moer dae su prèju de totu sos casos, non solu de su Romanu. Non est zustu, difatis, chi su prèju de su late dipendat dae su prèju de su Casu Romanu ebia chi sigomente rapresentat su 60% de su casu produidu in Sardinna, devet àere cussu pesu pro carculare su prèju de su late. S'àteru 40% diat dèpere dipèndere dae su prèju de sos àteros casos chi si bendent a prèjos meda prus artos de su Casu Romanu.

Custu mecanismu diat dèvere tènnere contu, finas de su recotu chi non benit pigadu in cunsideru pro carculare su prèju de su late. In prus tocat de li bogare cabu a sa chistione de s'IVA, ca su late berveghinu est s'unicu prodotu de sa massaria chi benit carculadu "IVA inclùdida".

Cunforma a su chi istabilit s'art. 62 de su D.L. 24/01/2012 n. 1, sos cuntratos deven èssere iscritos, ca galu oje sunt pagos sos chi ant su cuntratu iscritu.

In fines b'at de cunsiderare chi su Consòrtziu de su Casu Romanu no at aproadu su "*Piano di regolazione dell'offerta*" e custu cheret nàrrere chi non b'at làcanas a sa produzione de su Romanu cun sas consequentzias chi naradas in antis.

Petzi si totus pigant pessu de custas chistiones amus a àere unu tempus benidore de paghe e de benistare pro su pastoriu in Sardinna, si nono cheret nàrrere chi onzi pagos annos amus a dèpere bìere sos pastores protestende pro chi benzat pagadu su prèju zustu, e no unu prèju de gana, pro su sudore de su traballu issoro.